



Broj: 02-04-934/20
Datum, 02.10.2020. godine

ZAPISNIK **sa 38. redovne sjednice 6. saziva Općinskog vijeća Doboj Istok**

Tridesetosma redovna sjednica 6. saziva Općinskog vijeća održana je dana 26.09.2020. godine u zgradi općine Doboj Istok, u Klokotnici, sa početkom u 10,00 sati.

PRISUTNI: 15 vijećnika, Kemal Bratić, općinski načelnik, Omer Hadžić, sekretar općine, Alirizah Mujkić, pomoćnik općinskog načelnika za poduzetništvo i finansije, Damir Avdaković, šef odsjeka za upravljanje razvojem općine, Adi Tanović, konsultant na izradi Akcionog plana, te predstavnik RTV TK.

ODSUTNI: Senada Džanić, predsjednica kluba vijećnika SBB – BPS i Fajik Muratović, vijećnik SDP.

Sjednicu je otvorio i vodio predsjedavajući Općinskog vijeća, dr. Ferid Konjić.

Dr. Ferid Konjić, predsjedavajući Općinskog vijeća: „ Na početku 38. sjednice selamim načelnika sa saradnicima, kolegice i kolege vijećnike, goste i predstavnike medija. Niko nije najavio izostanak i molim tehničkog sekretara da nam provjeri prisutnost vijećnika. Prisutno je 15 vijećnika, a odsutni su Senada Džanić i Fajik Muratović. “

USVAJANJE ZAPISNIKA SA PRETHODNE SJEDNICA

Dr. Ferid Konjić, predsjedavajući Općinskog vijeća: „ Dobili ste zapisnik sa prethodne sjednice i ukoliko ima primjedbi na sam zapisnik dajem mogućnost da se iznesu. Ne vidim prijavljenih. Ko je za zapisnik?“

Glasanje: ZA – 15, PROTIV – 0, UZDRŽANIH – 0.

VIJEĆNIČKA PITANJA I INICIJATIVE

Dr. Ferid Konjić, predsjedavajući Općinskog vijeća: „ Ukoliko ima pripremljenih vijećničkih pitanja i inicijativa dajem mogućnost da se iznesu. Ne vidim prijavljenih.“

USVAJANJE DNEVNOG REDA

Dr. Ferid Konjić, predsjedavajući Općinskog vijeća: „ Dobili ste prijedlog dnevnog reda za ovu sjednicu, a nismo dobili nikakvih prijedloga za promjenu dnevnog reda i dajem na izjašnjavaње. Ko je za ovaj dnevni red?“

Glasanje: ZA – 15, PROTIV – 0, UZDRŽANIH – 0.

Konstatujem da je jednoglasno usvojen je sljedeći:

DNEVNI RED

1. Razmatranje i usvajanje prijedloga Odluke o raspisivanju javnog oglasa za izbor i imenovanje na pozicije predsjednika i članova upravnog odbora JZU Dom zdravlja Doboj Istok,
2. Razmatranje i usvajanje prijedloga Odluke o utvrđivanju javnog interesa da se poljoprivredno zemljište I – IV klase pretvori u građevinsko zemljište za izgradnju poslovnih objekata u Klokotnici i Stanić Rijeci,
3. Razmatranje i usvajanje prijedloga Akcionog plana održivog upravljanja energijom i prilagođavanja klimatskim promjenama Općine Doboj Istok (SECAP) za period do 2030. godine,
4. Razmatranje Izvještaja o realizaciji budžeta općine Doboj Istok za period januar-juni 2020. godinu,
5. Razmatranje Izvještaja o utrošku sredstava budžetske rezerve za period januar-juni 2020. godinu,
6. Razmatranje Izvještaja o procijeni nastalih šteta od prirodne nepogode – poplava i klizišta na području općine Doboj Istok u periodu 26.06.2020. do 08.07.2020. godine koji je sačinila Općinska Komisija za procjenu šteta na području općine Doboj Istok,
7. Razmatranje Informacije o uspjehu sportskih klubova u takmičarskoj sezoni 2019/2020. godina,
8. Razmatranje Informacije o provedenim aktivnostima povodom obilježavanja Dana brigade,
9. Razmatranje i usvajanje Programa obilježavanja Dana državnosti BiH,
10. Razmatranje obavijesti „Telemach“ Društvo za pružanje usluga u oblasti telekomunikacija d.o.o. Sarajevo o statusnoj promjeni.

REALIZACIJA DNEVNOG REDA

Ad. 1. Razmatranje i usvajanje prijedloga Odluke o raspisivanju javnog oglasa za izbor i imenovanje na pozicije predsjednika i članova upravnog odbora JZU Dom zdravlja Doboj Istok.

Dr. Ferid Konjić, predsjedavajući Općinskog vijeća: „ Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavanje. Ko je za?“

Glasanje: ZA – 15, PROTIV – 0, UZDRŽANIH – 0.

Ad.2. Razmatranje i usvajanje prijedloga Odluke o utvrđivanju javnog interesa da se poljoprivredno zemljište I – IV klase pretvori u građevinsko zemljište za izgradnju poslovnih objekata u Klokotnici i Stanić Rijeci.

Dr. Ferid Konjić, predsjedavajući Općinskog vijeća: „ Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavanje. Ko je za?“

Glasanje: ZA – 15, PROTIV – 0, UZDRŽANIH – 0.

Ad.3. Razmatranje i usvajanje prijedloga Akcionog plana održivog upravljanja energijom i prilagođavanja klimatskim promjenama Općine Doboj Istok (SECAP) za period do 2030. godine.

Dr. Ferid Konjić, predsjedavajući Općinskog vijeća: „Materijal ste takođe dobili, tačku dajem na diskusiju.“

Selmin Karić, vijećnik SDA: „ Uvaženi predsjedavajući, zamjeniče, kolege i kolegice vijećnici, predstavnici medija, gosti esalamu alejkum i dobar dan. Mislim da je ovo izuzetno bitna stvar da se bar ne kaže jedna ili dvije rečenice. Znači u pitanju je Akcioni plan održivog upravljanja energijom i prilagođavanja klimatskim promjenama Općine Doboj Istok (SECAP) za period do 2030. godine i ovaj plan nije samo bitan za našu općinu, bitan je na globalnom nivou, odnosno možemo reći za planetu zemlju u suštini. Znači odnosi se, kao što i sam naslov kaže, prilagođavanje klimatskim promjenama i upravljanje energijom. Potpisnici općina Doboj Istok, odnosno načelnik je potpisao ovaj sporazum, kao i mnoge općine i gradovi širom svijeta, odnosno sa skoro svih kontinenata su potpisnice ovog sporazuma. Ono što je bitno i čega smo se mi obavezali, kao i ostale potpisnice ovog sporazuma je smanjenje emisije

karbon dioksida, odnosno plasteničkih plinova za najmanje 40 % 2030. godine u odnosu na 2010. godinu, smanjen broj nesreća koje ugrožavaju život i zdravlje ljudi te dovode do velikih materijalnih šteta usljed elementarnih nepogoda za 80 % do 2030. godine. Da bi se ovo sve uradilo potrebno je implementirati mnoge projekte koji su predviđeni ovim planom. Ja se nadam da će naša općina, ali i sve ostale općine i gradovi koji su potpisnici SECAP-a to uraditi što će umnogome doprinijeti regulisanju klime na neki način na čitavoj planeti, a ne samo na našoj općini. Ja bih se zahvalio svima onima koji su učestvovali u izradi ovog plana, jer je stvarno trebalo puno puno truda i vremena da se uloži da se ovo sve uradi.“

Adi Tanović, konsultant na izradi Akcionog plana: „Uvaženi predsjedavajući, poštovane vijećnice i vijećnici želim da vas pozdravim ja sam Adi Tanović iz Centra za razvoj i podršku. Mi smo organizacija koja je pružala tehničku podršku u izradi ovog plana. Smatram da je plan jako značajna i važna stvar za općinu Doboj Istok koja targetira jako važna pitanja upravljanja energijom i prilagođavanja klimatskim promjenama. Usklađen je sa metodologijom i sporazumom gradonačelnika koji ima preko 10.000 potpisnika sa svih kontinenata, kao što je rekao vijećnik koji je pričao prije mene. Izradi plana su prethodile mnoge aktivnosti i ovom prilikom bih želio da pohvalim radnu grupu na čelu sa Damirom Avdakovićem koja je stvarno veliki posao uradila. Proračunali smo količinu emisija koja se trenutno emituje na području općine i na osnovu toga uradili niz mjera u sektorima zgradarstva, javnih objekata, stambenih kuća, javne rasvjete, vodosnabdijevanja i odredili način kako da se postigne to smanjenje od 40%. Naravno drugi dio prilagođavanja klimatskim promjenama gdje smo odredili kao najveću opasnost pojavu poplava i klizišta i na osnovu strategije razvoja, Agencije za vodno upravljanje sliva rijeke Save i drugih regionalnih i nacionalnih agencija odredili niz projekata koji bi doveli do ispunjenja drugog cilja. Ja sam tu za sva pitanja tehničke prirode. To bi ukratko bilo to.“

Dr. Ferid Konjić, predsjedavajući Općinskog vijeća: „ Hvala gospodinu Tanoviću. Ima li od vijećnika kakvih pitanja? Ne vidim prijavljenih i dajem na izjašnavanje. Ko je za usvajanje ovog plana?“

Glasanje: ZA – 15, PROTIV – 0, UZDRŽANIH – 0.

Ad.4. Razmatranje Izvještaja o realizaciji budžeta općine Doboj Istok za period januar-juni 2020. godinu.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Imate i zaključak Komisije za finansije koja nije mogla održati svoj sastanak.“

Selmin Karić, vijećnik SDA: „ Meni je žao što Komisija za budžet i finansije nije mogla održati sastanak, ali to je izgleda nekakva ustaljena praksa. Koliko vidim ove komisije više se ne održavaju nego što se održavaju, pa u narednom periodu malo više treba posvetiti pažnje tome. Naročito kada su u pitanju vanjski članovi treba pomno birati ljude, jer ako se neko prihvatio posla valjda je red i da odradi taj posao. Mi smo trebali u srijedu održati sastanak kada sam ja mogao, jer u četvrtak nisam mogao, ali su ostali mogli i ja sam prilagodio sve svoje poslove tom danu, a trebao sam biti na nekakvom simpoziju, pa sam pratio na drugi način da bi prisustvovao tom sastanku, međutim kolege koje su rekle da će doći, nisu. Nećemo o tome diskutovati samo kažem da treba ubuduće posvetiti više pažnje tim komisijama, odnosno da li su nam potrebne ili na kraju krajeva, nisu. Kada je u pitanju izvještaj o izvršenju budžeta općine Doboj Istok za period 01.01. – 30.06. iz ovog priloženog dokumenta može se reći da su prihodi sa 43,82% izvršenja pratili rashode sa 43% izvršenja što je sa odstupanjem sa nekih 0,82% prihvatljivo i u granicama je tolerancije, a što znači da se budžetom upravljalo domaćinski i u skladu sa preporukama federalne vlade i Ministarstva finansija vezano za ublažavanje posljedica ekonomske krize uzrokovane pandemijom koronavirusa. Realizacija prihoda, kao što se vidi, od direktnih poreza je nešto veća od plana što je naravno za svaku pohvalu, a realizacija prihoda od indirektnih poreza je manja od plana za nekih 9% što je u stvari direktna posljedica globalne ekonomske krize uzrokovane ovom pandemijom. To je u suštini i razlog ukupne manje realizacije na ukupnim prihodima za nekih 6% u odnosu na plan budžeta za 2020. godinu. Kada su u pitanju rashodi i izvršenje na platama kao što se vidi pratilo je plan od 47 % i svi ostali rashodi su u većoj ili manjoj mjeri pratili plan. Naravno uz preporuke federalne vlade kao što sam već rekao i Ministarstva finansija, a vezano za ublažavanje posljedica ekonomske krize. Sve pohvale za one koji su učestvovali u realizaciji budžeta, a naravno i u pripremi izvještaja o realizaciji budžeta za 01.01. – 30.06.2020. godine.“

Emira Karić, predsjednica kluba vijećnika SDP: „ Pozdravljam sve prisutne. Kada je u pitanju transparentnost i otvorenost lokalne samouprave onda se glavni atak stavlja na budžet i na nabavke. Šta se pod tim podrazumijeva. Transparentnost ovog budžeta ne možemo reći da ga nema. Ima ga u jednom dijelu. Taj dio se odnosi na postavljanje nacrtu budžeta na web stranicu i nakon nacrtu budžeta održavaju se javne rasprave. Međutim ovakav vid transparentnosti itekako pada u vodu ako dobijemo ovu formu budžeta. Forma budžeta mora sadržavati osnovna tri postulata. To je razmljivost, odnosno da bude jasan građanima i onima koji su izabranin od stane građana. Treba da bude slikovit, da sadrži određene dijagrame u raznim formama kako bi građani i oni koji su izabrani od njih mogli raditi određene uporedbe, mogli diskutovati o tome itd. Takođe mora biti narativan, mora objašnjavati određene stvari i određena odstupanja, sve one stvari koje bi se trebale riječima objasniti. Tako da ovaj budžet ništa od toga nema, kažem transparentnost pada u vodu. Upravo budžet općine Doboj Istok treba da bude budžet za građane. Bar 50%, a prednost je da to bude više od 50 %, treba građani da sudjeluju u realizaciji ovog budžeta na različite načine. Kolika će biti transparentnost u budućnosti ne znam i treba se uhvatiti u koštac sa time bez obzira što stojimo, sa blagim pomakom, od '98. Svu sreću želim onima koji će se uhvatiti u koštac sa budžetom i sa svim onima što nije dobro što se radi na općini Doboj Istok.“

Sajib Mešić, zamjenik predsjedavajućeg Općinskog vijeća Doboj Istok: „ Poštovani predsjedavajući, uvažene kolegice i kolege, načelnice sa saradnicima, prisutni predstavnici medija. Mene lično ovaj izvještaj je iznenadio i moram priznati prijatno. Ako obratite pažnju na prihodovnu stranu i zbog toga sam i osjetio potrebu da izađem i da to kažem, gdje se u nekoliko stavki, a možemo to i pokazati, porez na promet od nepokretnosti da je daleko uvećan, pa prihodi od poreza na dohodak po konačnom obračunu, pa općinske komunalne takse, pa naknada po osnovu renti itd. Poenta ovog svega je u stvari da pored ovakve situacije kakva vlada ne samo kod nas vezano za ove viruse, da se ipak na našoj općini nešto radilo, prodavalo, privređivalo, dakle postojala su ekonomska kretanja. Znači građani nisu posustali i radilo se i zato su pokazatelji i ovi prihodi što mene lično ohrabruje i zato sam našao za shodno da ovo naglasim i da ovo jasno kažem. Što se tiče rashodovne strane mogu samo reći domaćinski je i u skladu sa zakonom sve ostalo obavljeno i to je to.“

Omer Sofić, vijećnik SBiH: „ Pozdravljam sve prisutne. Iako sam novi što se tiče izvještaja o izvršenju budžeta ne mogu a da ne progovorim bar jednu riječ. Ostala razlika 154.000, a što smo mi ovdje, boračke populacije, mjesne zajednice koje nisu iz budžeta za 6 mjeseci uzele ni 0,01 %. Da li se prema tim populacijama odnosi ucjenjivački, jer izgleda ima više prava da ostvari prihod i dobit pojedinac nego te populacije. Trebalo je izmiriti prema njima bar 50%, jer je bilo nekih situacija gdje su mjesne zajednice uradile dosta posla, a one žive na kašičicu i nemaju svi dobre prihode kao MZ Klokotnica. Boračke populacije žive od te male crkavice i članarine i bilo bi dobro ubuduće ako imamo sredstva da se izmiri bar ono što im je predviđeno.“

Kemal Bratić, općinski načelnik: „ Uvaženi predsjedavajući, zamjeniče, vijećnici i vijećnice, predstavnici medija esalamu alejkum. Budžet nije slikovnica. Svako ko hoće da čita budžet on će ga shvatiti. Ono što je bitno jeste da mi za prvih šest mjeseci, gdje je globalna procjena u cijelom svijetu da su prihodi pali, nismo u minusu. To je po meni jedina dobra i jedina bitna stvar. Nadam se da me neće krivo shvatiti uvaženi vijećnik Sofić to je stanje sa 30.06. i ono se sada itekako promijenilo. Mislim da je čak došlo do 70% kako udruženjima tako i mjesnim zajednicama. Ono što je bitno istaći nije ova razlika, ovaj plus, to su namjenska sredstva i to nisu sredstva koja mi možemo trošiti u budžetu onako kako mi hoćemo. Nema ništa transparentnije u općini Doboj Istok od budžeta i nema ništa transparentnije od javnih nabavki. Svaka javna nabavka zna se kako ide i gdje ide, kao i budžet. Znači imaju institucije koje to prate i koje to rade i naravno imaju oni koji su odgovorni za to. Ako se sjećate mi svake naredne godine raspravljamo o svim projektima imenom i prezimenom gdje je šta uloženo. Ono što ja vama želim reći jeste da sa današnjim datumom mi imamo 600 – 700, pa možda i 800.000 KM namjenskih sredstava i koja će namjenski biti utrošena za određene projekte na području općine Doboj Istok. Ja se ne bih složio da općina Doboj Istok ne daje sredstva građanima općine Doboj Istok. Ja se sa time ne bih nikako složio. Ko god hoće da analizira vidi da mi iz godine u godinu sve više i više vraćamo građanima određenu količinu sredstava, naravno u skladu sa našim mogućnostima. Ja bih najsmretniji bio da dajemo 70% građanima, a da 30% koristimo u nekakve materijale troškove i javnu upravu. Po meni najbitnija stvar je da smo mi ispoštovali sve ono što je u skladu sa zakonom i plaće i naknade i materijalne troškove i svim ustanovama čiji je osnivač općina Doboj Istok. Malo pratite druge općine, jer ima općina u kojima kasne plate po dva tri mjeseca, ima općina koje ne plaćaju doprinose i ostale stvari koje su u skladu sa zakonom. Kako će

dalje biti? Ne znam. Kako će dalje ova pandemija da se ponaša niko od nas ne zna. Ono što ja znam jeste da je od početka pandemije do nekakvog ublažavanja mjera na području općine Doboj Istok samo 50 ljudi izgubilo posao. nakon toga opet je počeo porast upošljavanja i to je dobra stvar. To je stvar o kojoj mi treba da pričamo. Naravno uvijek može bolje i uvijek može više. Ono što je takođe bitno jeste, za one koji se ne sjećaju, kada sam prvi puta izabran za općinskog načelnika 2012. godine bilo je 37 uposlenih, a danas je 29 sa mnom. Znači za 30% smo smanjili broj uposlenih u organu uprave i opet sve funkcioniše. Ja odgovorno tvrdim da može 25 i ići ćemo u tom pravcu iza ovih izbora u novembru na smanjenje upravo prema onim standardima Evropske unije i da se makar približimo tom smanjenju. Znači sa 37 radnika spalo na 29 i sve funkcioniše. Malo je nezgodno u vrijeme godišnjih odmora sve poklopiti i poslagati, ali mislim da ne šteka. Tako da sam ja ponosan da smo u ovih prvih šest mjeseci bili u nekakvom plusu i da nismo nikome dužni. I to je veoma bitno istaći da nismo dužni ni jednom dobavljaču, ni jednom izvođaču radova ni jednog jedinog feninga općina Doboj Istok nije dužna. Znači sve ono za šta smo nekoga angažovali uredno smo ga platili. Da ne govorimo o nizu projekata koje smo ovih dana raspisali i koje ćemo uraditi. Preko milion KM će se uložiti na području općine Doboj Istok, ako Bog da, do nove godine. To nije mala stvar. Tako je bilo i prethodnih godina kada nisu bili izbori, mi smo gledali da damo svoj maksimalan doprinos u razvoju naše lokalne zajednice.“

Emira Karić, predsjednica kluba vijećnika SDP: „ Ako želite, gospodine načelniče, ja ću vama proslijediti jedno jako interesantno štivo, a zove se Otvorenost lokalnih samouprava u Bosni i Hercegovini u kojem se otprilike govori o ovakvom izgledu budžeta o kojem sam ja diskutovala u svojoj diskusiji. Ova forma ni 1 % ne liči na ono što bi trebala biti forma budžeta svih općina na području Bosne i Hercegovine, a naravno i općine Doboj Istok. Vi nama ovdje izlažete neke stvari koje treba da budu u narativnom dijelu, ako ništa u izvještaju o izvršenju budžeta. Mi građani ne možemo pretpostaviti kada neko metra nešto evo nešto se događa i neki se projekat sprema i da vi meni putem muštuluka načelniče govorite o nekim projektima. To je meni nekako nazadno, nekako ruralno i nikako ne ide prema nekim demokratskim sistemima u kojima demokratija, odnosno transparentnost, otvorenost i saradnja sa svim što postoji na općini Doboj Istok, kao što su mjesne zajednice, kao što su udruženja itd. Ja ću se malo dotaknuti Sofića koji je rekao za mjesne zajednice, koje su osnovne ćelije lokalne zajednice, jer koliko je mjesna zajednica jaka, jaka je i lokalna zajednica. Koliko se saraduje sa mjesnim zajednicama toliko je prosperitet na općini Doboj Istok jači. Od 2012. godine, gospodo, ne saraduje se sa mjesnim zajednicama. Mjesne zajednice su iza leđa, donje, tako i društva, tako i sve ono što postoji. Moram reći zašto. Zato što je ova vlast odlučila, kada već moram da repliciram, da se otkuči od demokratije i da se približi nekom diktatorskom režimu. Čitajte malo ako želite o demokratiji i ja ovo ne iznosim zato što se želim svađati sa nekim, nego zato što stanje inicira ove moje diskusije.“

Dr. Ferid Konjić, predsjedavajući Općinskog vijeća: „ Po običaju ne pričamo uopšte o onome što je tema. Replika jest, ali je ovo i predizborni govor i ja puštam nije nikakav problem. Ovdje imamo izvještaj i možemo pričati o izvještaju, a ne o impresijama o nekakvim stvarima demokratije i svega toga.“

Mehmed Mehinović, predsjednik kluba vijećnika SBiH: „ Bio sam odlučio da ni o čemu ne diskutujem danas iz razloga baš ovo o čemu je prethodnik rekao. Međutim iziritiran svim prethodnim diskusijama o budžetu i obzirom da smatram da ovu materiju znam dobro nije na odmet da malo prokomentarišem i da pojasnim neke stvari. Naravno ako se pogleda u izvještaju o izvršenju budžeta, obzirom na situaciju koja vlada u našem okruženju, pa i kod nas, smatram da je struktura jako dobra i da je dobro napravljen, izvršenje je solidno. Međutim Stranka za BiH neće podržati ovaj izvještaj iz razloga kojem ostajemo dosljedni zato što nema narativnog dijela. Za mene nije transparentno samo da se poredaju konta koja su po zakonu jasna i moraju biti takva, ali po meni bi trebalo da bude jasan konto 821614 rekonstrukcija zgrada za godinu planirano 100.000, a potrošeno 181.000 za šest mjeseci i da se ne kaže gdje je to otišlo. Neću da kažem da nije trebalo ili nije moralo i možda bi i ja glasao za to da je pojašnjeno gdje je potrošeno 181.000 sa jednom ili dvije rečenice. Možda je i opravdano i ne ulazim i meritorne važnosti, ali ja ne vidim gdje je to. Neki dan sam pročitao jednu priču gdje je grupa vijećnika u općini Novi Grad Sarajevo tužila i vijeće i načelnika zbog toga što nema odgovora na neka pitanja. Ja od 2018. godine čekam odgovor na pitanje kada sam pohvalio gdje je to potrošeno i čestitao onima koji su obezbijedili 900.000 investicije. Ja nisam znao gdje su otišle te investicije, a ni dan danas ja to ne znam. Struktura je dobra i uvaženi vijećnik Sajib što je govorio o prihodima, jer mene uvijek prihodi više interesuju nego ovaj dio. Smatram da su solidni prihodi, međutim želim da znate da se komunalne takse naplaćuju u prvom polugodištu i njih neće biti u drugom polugodištu i one su 99% naplaćene. Tih prihoda neće biti u drugoj godini i zato i jeste

ostvarenje tako. Porez na nekretnine, to je stvarno dobro odrađeno, međutim one mogu biti, a mogu i ne biti, ali važno je da je dobro, kao što reče uvaženi vijećnik Sajib, da je živost na općini, da se pokazuje da ima života i da se radi. Porez na dohodak se ostvaruje u prvoj polovini godine, a on je dobar što znači da se u prošloj godini radilo dosta solidno i naplaćen je dobro u ovoj godini i to je jako dobra stvar. Moram isto tako reći, koliko me pamet služi, nemam ovdje dokumenta, ali čini mi se da je sa načelnikom 2012. godine, neću tvrditi, a može biti jedan više ili manje, da je samo 33 radnika predato u primopredaji, da je bilo uposlano 33, nije 37 sigurno. Ja kažem 33, a možda je 34 sa načelnikom. Prema tome i te stvari sam htio da pojasnim i ponovo da kažem u ovakvoj situaciji meni je lično žao kao čovjeku koji razumije finansije, a čini mi se da ih dobro razumijem, i s obzirom da je suficit, znam ja da je ovo od namjenskih sredstava nepotrošeno, kada se pravi izvještaj i kada se podvlači sa 31.12. pa sa 31.06. pa i sa 30.09. ima duga i postoji dug. Dođe faktura za struju ona se knjiži u tom periodu i moraš je prikazati kao dug, a struje mi plaćamo koliko plaćamo. Dođe račun za telefon, ukalkuliši platu, a ti si dužan platu i prema tome ne može se reći ja nisam dužan. U datom trenutku kada se napravi presjek svaka institucija, ne samo općina Doboj Istok, može biti dužna makar za te redovne troškove. Naravno ovdje se misli vjerovatno na to da se nije dužno dobavljačima i za izvršene investicije i to je dobro naravno. Na kraju moram reći da je struktura dobra, ali da neko kaže da je transparentan, nije. Nije iz ovih razloga o kojima sam ja pričao. Nisu samo cifre transparentnost, transparentnost ide sa narativnim dijelom.“

Hasan Hasančević, predsjednik kluba vijećnika SDA: „Uvaženi predsjedavajući, zamjeniče, kolegice i kolege vijećnici, načelniče sa saradnicima pošto se prvi puta javljam želim da vas poselamim. Neću govoriti o stvarima koje su neki iznijeli, ali očito je da je laž nesaradnja sa mjesnim zajednicama. Zašto se to iznosi za govornicom, to ne znam. Očita laž. Kada biramo savjete i predsjednike, a ja sam dobro osjetljiv na tu temu, jer predsjednici mjesnih zajednica treba da kopaju oči i svojim vijećnicima iz mjesnih zajednica i načelniku svaki dan. U suprotnom bude ono što bude jedni sarađuju dobro i kopaju oči, a jedni neće ni da dolaze nikako ni da pitaju, neće ni da pošalju akt za bilo šta. Onda se postavlja pitanje nesaradnje. Znači očita je laž nesaradnja. Ja sam imao čast da budem predsjednik najveće mjesne zajednice u Doboj Istoku i znaju ovdje prisutni da sam kopao oči i vijeću i načelniku i svakome samo da se ostvare projekti na području te mjesne zajednice. Tako treba da rade, a ne da očekuju da neko dolazi da ih nešto moli i to je davno završen posao da će neko raditi nešto za nekog drugog. Mi moramo ubuduće birati članove savjeta ljude koji hoće dati dio sebe za društvenu zajednicu.“

Kemal Bratić, općinski načelnik: „Ja prvi puta čujem da nemamo saradnju za mjesnim zajednicama i malo me to iznenadilo. Ne znam po kojoj se vi mjesnoj zajednici mjerite, možda samo po jednoj sa područja općine Doboj Istok, mada ja imam izuzetno dobru saradnju i sa rukovodstvom te mjesne zajednice. To što se oni ne sastaju i ne sazivaju sastanke, ja ih na to ne mogu natjerati, a možda nekada otvorimo i tu temu na ovome. Ono što me ponukalo u ovim diskusijama, ne tražim da me iko hvali, ne tražim da mi iko likuje, ne tražim bilo šta od toga, ali lahko je biti general poslije bitke svima nama. Hajmo se vratiti na početak marta. Slažem se gospodine Sofiću da treba mjesnim zajednicama više dati, ali ko je tada smio to raditi u cijeloj Bosni i Hercegovini. Svi smo se rukovodili, evo ja sam se rukovodio da idemo oprezno prvih šest mjeseci, jer nismo znali na šta će ovo izaći. Ko je od nas znao? Ko to od nas zna šta će biti za mjesec dana sa ovom epidemijom? Ja vam odgovorno tvrdim da smo otprilike to sve do sada ispeglali, a išao sam oprezno, jer ne znam šta, nemamo pomoći od ovoga, nemamo pomoći od onoga za te stvari i išli smo da rješavamo ono što nam je zakonom propisano da moramo, da svaka stavka u budžetu ne mora se ostvariti, a nekada se i ne ostvari. Ako nas pamćenje dobro služi, a mislim da služi mi smo svaku prethodnu godinu ispunjavali 100% davanja i udruženjima i mjesnim zajednicama, a pogotovo udruženjima od posebnom značaja, pored nekakve drugačije pomoći koju smo davali savjetima mjesnih zajednica. Moramo malo ući u dubinu problema da bi to malo bolje razumjeli. Ovdje ne bih želio komentarisati neke stvari i ja želim da razgovaramo o izvešenju budžeta i drago mi je što smo jedna od rijetkih općina koja nema nekakvih nesagledivih posljedica, kao što neke druge imaju kada se radi o budžetu. Budžet je stabilan i to nam svima treba da bude najbitnije, budžetski korisnici su redovno isplaćivani i ja se nadam da će ostati do kraja ove godine.“

Emira Karić, predsjednica kluba vijećnika SDP: „Objasnit ću kako ja podrazumijevam saradnju sa mjesnim zajednicama. Podrazumijevam kao obavezu da općinski načelnik sa službom kvartalno posjećuje svaku mjesnu zajednicu, odnosno savjet mjesne zajednice i da se tačno zna o čemu će se razgovarati, dnevni red itd. što u ovih osam godina nije urađeno. Da se mjesečno sastaje načelnik sa predsjednicima mjesnih zajednica i upravo dogovara o svim onim stvarima koje je potrebno dogovoriti. Mala ispravka, da,

sarađuje se sa Mjesnom zajednicom Klokočnica isključivo zato što treba potrošiti taj lijepi budžet koji ima Mjesna zajednica Klokočnica. Tako da te stvari budu jasnije. Načelnice, ne zaboravite da mi razgovaramo o 30.06. ovdje i nekako stvari stoje kako treba. Jasno vam je da je došlo do otpuštanja određenih radnika na području naše općine. Da li će do tog doći, a nadam se da neće, da će čak što više biti jedna suprotna situacija. Međutim izvještaj 30.09. neće biti baš ovako sjajan i neće se baš moći neke stvari realizirati, bar koliko moja malenkost razumije da neka ekonomska dešavanja. Zašto je naš budžet i dalje stabilan? Sve zemlje koje nisu prosperitetne nekako su se održale sa ovom pandemijom. Onaj ko ima jako razvijeno to ekonomsko tržište, naravno čim to stane da se lome koplja oko tih budžeta. Mi kao ruralna sredina ovakvu vrstu stvari puno i ne osjetimo, ali da ćemo osjetiti, osjetiti ćemo u narednom periodu.“

Omer Sofić, vijećnik SBiH: „Ja sam i rekao da neću ulaziti u srž, ali ovdje piše 30.06. i možda je trebalo uz ovaj izvještaj stajati da su izmirene obaveze koje su trebale biti predviđene za ove organizacije, odnosno mjesne zajednice. Neću dozvoliti da se spominje moje ime u negativnom kontekstu, a jasno mi je šta je budžet, jer radio sam ja na tim poslovima. Znači kada se nešto predvidi, ne treba da dolazi po svoju stavku i da moli. Bio sam i ja predsjednik mjesne zajednice i u ovim organizacijama. Jasno mi je da je izmireno i neka je izmireno, ali ovdje stoji da im je do 30.06. izmireno 30 %.“

Selmin Karić, vijećnik SDA: „Znači jedna od mjera kada su u pitanju ekonomske posljedice uzokovane koronavirusom od strane federalne vlade, a koja je išla prema kantonalnoj vladi i prema općinskim budžetima dok je trajala pandemija je bila da se davanja prema udruženjima građana, nevladinim organizacijama itd. smanje za 50%. Za ovaj period, konkretno govorim o ovom periodu, dato za je 5 % više u odnosu na to što je preporučeno. Znači mora se sve pratiti, jer je jedna od preporuka federalne vlade to bila.“

Kemal Bratić, općinski načelnik: „Ja zbilja ne znam ko koga moli tu da nešto prebaci. Ponavljam načelnik se svakodnevno sastaje sa predsjednicima mjesnih zajednica iako to nije stvar ove tačke dnevnog reda. Želim da kažem ovdje, a vidjet ćemo se opet kada bude budžet, u izvršenju za devet mjeseci puno je bolje stanje. Ovdje odgovorno tvrdim da je dobro preko 4 miliona već otišlo prihoda, tako da mi se borimo i trudimo. Ja ponavljam, a ne želim da branim ovo, ovo je takvo kakvo je, ali ponavljam lahko je biti general poslije bitke. Pitao bih se da je bilo ko od vijećnika bio na mom mjestu tada, jer nije bilo jednostavno. Nismo mogli naći nikoga da podijeli rješenja za ove koji su u izolaciji, pa je jedan od vaših kolega Hasančević dobrovoljno se javio i rekao ja ću načelnice. Svi su izmicali, niko nije mislio o prihodima i sredstvima. Ponavljam, opet ne znam šta nas dalje čeka i dabogda se to više nikada ne ponovilo. Bio sam u ratu, preživio sam ove poplave, a ovo je bilo šest puta gore, jer ne znamo šta je, ne vidimo, a evo i danas živimo sa time. Šta nam je bio prioritet? Prioritet nam je bio da ne odemo u nekakvu dubiozu. Šta je dalje bio prioritet? Da zaštitimo ono što možemo zaštititi što je u našoj nadležnosti. Šta još? Da nabavimo nešto opreme. Sve smo to uradili i nismo napravili minusa i nismo trošili bez veze sredstva. Sredstva se mogu podijeliti, svako to zna. Ako imaš 20 KM i znaš da ih nisi potrošio, možeš ih potrošiti sutra, a tako i budžet. Ja ne znam kako bi pojedini vijećnici reagovali da smo mi u nekakvoj dubiozi. Smatram, ne ja sam nego svi mi zajedničkim snagama da smo dobro odgovorili ovome što se zove pandemija ili epidemija i da i dalje imamo u nekakvoj rezervi sredstava ako, ne daj Bože, ode u gorem pravcu. Ja se više neću javljati predsjedavajući, a vas bih zamolio da se striktno držimo ovih stvari koje su na dnevnom redu.“

Emira Karić, predsjednica kluba vijećnika SDP: „Pošto sam čula predsjedavajući da vi ove konstruktivne diskusije smatrate kao predizbornu kampanju, samo da kažem da se ni na ovoj ni na idućoj neću više javljati da ne bi stvari u tom smislu vi shvatali.“

Dr. Ferid Konjić, predsjedavajući Općinskog vijeća: „Hvala za tu odluku. Ima li još diskutantata? Ne vidim prijavljenih i dajem na izjašnjavanje. Ko je za?“

Glasanje: ZA – 10, PROTIV – 0, UZDRŽANIH – 5.

Ad.5. Razmatranje Izvještaja o utrošku sredstava budžetske rezerve za period januar-juni 2020. godinu.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavanje. Ko je za?

Glasanje: ZA – 15, PROTIV – 0, UZDRŽANIH – 0.

Ad.6. Razmatranje Izvještaja o procijeni nastalih šteta od prirodne nepogode – poplava i klizišta na području općine Doboj Istok u periodu 26.06.2020. do 08.07.2020. godine koji je sačinila Općinska Komisija za procjenu šteta na području općine Doboj Istok.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavanje. Ko je za?

Glasanje: ZA – 15, PROTIV – 0, UZDRŽANIH – 0.

Ad.7. Razmatranje Informacije o uspjehu sportskih klubova u takmičarskoj sezoni 2019/2020. godina.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Hasan Hasančević, predsjednik kluba vijećnika SDA: „Pošto je Sportski savez obrađivač ove informacije moram napomenuti da su svi sportski klubovi dali svoje izvještaje o radu, o transparentnosti utrošenih sredstava, o rezultatima koje su postigli i želim da se zahvalim svim sportskim kolektivima koji su uspjeli, naročito u ovom polugodištu u vrijeme ove pandemije, održati se uopšte da postoje, održati neka takmičenja i turnire i vratiti se polagano u takmičarsku sezonu koja je, ko prati malo više sportska dešavanja, u toku i što se tiče fudbala i stonog tenisa i šaha i svega ostalog. Ovdje su navedene neke stvari koje mi već znamo i ovom prilikom ja želim da se zahvalim ljudima iz općine, načelniku i svim prijateljima sportskih klubova i privrednicima koji su davali svoja sredstva. Evo informacija da će se do kraja ove godine u sportske objekte uložiti određena sredstva govori nam da se razmišlja u ovoj lokalnoj zajednici o sportu ili fizičkoj kulturi i da obavijestim one koji ne znaju da će ubrzo radovi na izgradnji tribine u Velikoj Brijesnici na nogometnom stadionu Mladosti i takođe su neki radovi na stadionu Luke u Klokotnici. Početak sportske dvorane gdje će takođe biti olakšane aktivnosti kako djeci školskog uzrasta za tjelesni odgoj, tako i nekim sportskim klubovima koji će moći koristiti to. U toku je takođe izgradnja travnatog terena od strane škole sporta DI – FIVE u saradnji sa Općinom i Mjesnom zajednicom Klokotnica, tako da ćemo imati puno bolje uslove za razvoj sporta na području općine Doboj Istok u 2021. godini, ako Bog da. To su dobre vijesti i dobre stvari i još jedanput bih se zahvalio svima koji su uspjeli da održimo ove sportske klubove ovdje.“

Selmin Karić, vijećnik SDA: „Ja prije svega želim svim sportskim klubovima i sportskim radnicima da čestitam na uspjesima i postignutim rezultatima, a naročito na masovnosti, odnosno broju članova. Ja smatram obzirom da su svi naši klubovi uglavnom amaterski i da ti nekakvi rezultati treba da budu na drugom mjestu, a na prvom mjestu treba da bude masovnost, odnosno članstvo. Po ovom izvještaju vidi se da klubovi imaju oko 390, a mislim da je oko 420 članova, jer Karate klub ima 90, a ne 60 članova. Ja smatram da bi ova brojka trebala da bude puno veća, jer sport je prevencija protiv bolesti, sport je prevencija protiv droge, alkohola itd. Još jedanput velika zahvala svim sportskim radnicima koji stvarno ulažu puno napora, ali evo i preporuka da još više omasove svoje članstvo.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih i dajem na izjašnjavanje. Ko je za ovu Informaciju?

Glasanje: ZA – 14, PROTIV – 0, UZDRŽANIH – 0 (Mehmed Mehinović je trenutno odsutan).

Ad.8. Razmatranje Informacije o provedenim aktivnostima povodom obilježavanja Dana brigade.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavanje. Ko je za ovu Informaciju?

Glasanje: ZA – 14, PROTIV – 0, UZDRŽANIH – 0 (Mehmed Mehinović je trenutno odsutan).

Ad.9. Razmatranje i usvajanje Programa obilježavanja Dana državnosti BiH.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavanje. Ko je za?“

Glasanje: ZA – 14, PROTIV – 0, UZDRŽANIH – 0 (Mehmed Mehinović je trenutno odsutan).

Ad.10. Razmatranje obavijesti „Telemach“ Društvo za pružanje usluga u oblasti telekomunikacija d.o.o. Sarajevo o statusnoj promjeni.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavanje. Ko je za ovu obavijest?“

Glasanje: ZA – 14, PROTIV – 0, UZDRŽANIH – 0 (Mehmed Mehinović je odsutan).

Na ovaj način smo iscrpili današnji dnevni red. Hvala vam na učešću u radu.“

Sjednica je završena u 10,55 sati.

*ZAPISNIČAR
Behara Hadžić*

*SEKRETAR
Omer Hadžić*

*PREDSEDAVAJUĆI
OPĆINSKOG VIJEĆA
Dr. Ferid Konjić*

Službena zabilješka:

Zapisnik je usvojen na 39. redovnoj sjednici Općinskog vijeća Doboj Istok održanoj dana 31.10.2020. godine.

U Klokotnici, dana 02.11.2020. godine

*Zabilješku sačinio
Omer Hadžić, sekretar Općine*